



Uunga siunnersuut: Sanaartornermi neqerooruteqartitsisarneq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx,xx.xxx 2020-meersoq.

(Aningaasanik killigititassanik iluarsineq, atuuffinnik erseqqissaaneq, siumoortumik neqerooruteqartitsinani aamma isumaqatigiiffiusumik neqeroortitsinani suliariumannittussarsiuussisarnissamik piumasaqaatit pillugit aalajangersakkat, siumoortumik nalunaaruteqartarnissamik atuutsitsilerneq kiisalu Neqerooruteqartitsisarnermut Maalaaruteqartarfik pillugu aalajangersakkanik atorunnaarsitsineq)

(Ineqarnermut Attaveqaqatigiinnermullu Naalakkersuisoq)

Inuit Ataqatigiit pingaartitaraarput nunatsinni naalakkersuinikkut ingerlatsinermi torersumik aammalu uparuaruminaatsumik apeqquuseruminaatsumillu pisortat ingerlatsinissaat. Maanna Naalakkersuisut siunnersuutigaat nunatsinni sanaartugassanik allanillu pisortat suliariumannittussarsiuusseqaarnatik suliakkiisalernissaat. Tamannalu pissasoq aningaasanik annertussusiliinerit killigititat nutaat aallaavigalugit allaffissornikkut suliaqartut suliakkiiginnartalernissaat ammaanniarneqartoq malugaarput.

Inuit Ataqatigiit isumaqarpugut taamatut aqqissuussinerup malitsigissagaa ullumikkut sanaartortut mikinerit aammalu suliaasaqarnissaminnik pisariaqartitsinerpaat pitsaanngitsumik eqqorneqaatigissagaat. Ilisimareerparpummi inissiaatileqatigiiffiit pisortanit pigineqartut suliakkiisarnerat kinaassusersiorpallaamik ingerlanneqartarnerat sanaartortuniit arlalinnit uparuarneqartartoq. Allaffissornikkut suliakkiinerit suliffeqarfinnut ataasiakkaaginnarnut siuarsaaleratarsinnaanerit inatsisikkut erseqqissumik killilersimaarneqanngitsoq malugaarput.

Pisortat sanaartugassanut amerlaqisunut aningaasaliisarnerat ilisimaneqarpoq, suliaasaqarfiit ilai aningaasarpassuarnik aserfallatsaaliinermut aningaasaliissutinik atugassinneqartarput. Taakkuali aningaasarpassuit atiorlugit suliaasanik amerlasuunik kittaartumik sanaartortumut ataasiinnarmut suliakkiisinnaatitaalernissaat ammaanneqassaaq. Inuit Ataqatigiit-nniit

ernumartortaqartipparput sanaartortut mikinerit, kisianni ilinniartunik
pikkorissartoaqarumanerpaajusartut siunissami pitsaanngitsumik eqqugaanissaat.

Ammasumik suliariumannittussarsiuussisoqartarnerata pitsaaqutigaa suliakkiisut
sanaartortussallu akornanni kinaassusersiortoqannginnissaa qulakkeertarmagu. Aamma
pisortat aningaasaataasa kinaassusersiortumik iluanaarutaanatillu uparuaruminaatsumik
atugassiissutaanissaat qulakkeertarmagu. Tamanna aamma akikinneqqusaatsitsilluni
suliakkiisarnermik malitseqartarmat inuiaqatigiit aningaasaataannik isaasalerlugu
"atuilussinnartoqannginnissaannik" qulakkeerisuusarpoq.

Naalakkersuisut periarfissaqareerput suliakkiinerit aalajangersimasut inuiaqatigiinni
suliffissanik pilersitsineq annertuneruppat, imaluunniit ilinniartoqarnikkut allatigullu
inuiaqatigiinni iluaqutaanerusussanik suliariumannittussarsiuussinikkut
akisunerugaluarpalluunniit toqqaassallutik. Akerlianillu aamma akikinnerpaanik
sanaartorumasunik toqqaanissamut malitassat erseqqilluinnartut periarfissaareersut
tunnigavigalugit suliakkiisinnaareerput.

Inuit Ataqaatigiit siunnersuut pillugu taamak oqaaseqarluta siunnersuut
tapersersinnaannginnatsigu naqissusissavarput. Nunatsinni inuiaqatigiit aningaasaataat
atorlugit suliakkiinerit torersumik suliakkiisarnermik ingerlanneqarnissaat attackumavagut.
Politikkikkut illersorneqarsinnaasumik ingerlatsisoqarnissaa attackumagatsigu aamma
allaffissornikkut sullissineq politikkikkut illersorneqarsinnaasoq attackumagatsigu siunnersuut
taamak oqaaseqarfigalugu Inatsisartuniit itigartinneqarnissaa inassutigaarput.